

A tornin i cartei trilengâi su la trate Udin-Cividât

La ARLeF e pant la sô sodisfazion: la reinstalazion e rinfuarce lis
racomandazions che il Consei di Europe al indrece aes Regions
in materie di tutele e valorizazion des lenghis minoritariis

Tes stazions ferroviariis de trate Udin-Cividât a son tornâts i cartei trilengâi. La
segnaletiche e jere stade gjavade par vie dai lavôrs di rinovament de infrastrutture
feroviarie, inte suaze dal passaç di gjestion de linie di FUC – Ferrovie Udine-Cividale a
RFI-Rete Ferroviaria Italiana, che, daûr de leç, e subentrarà par gjestî la infrastrutture e il
servizi.

*«Chest sucès impuartant al è il risultât di un lavôr di grup costant e puntuâl, metût in vore
in pôcs mês. RFI e à cjapât sù daurman la istance che la ARLeF, cuntune letare formâl, e
veve mandât al president de Republiche, Sergio Mattarella. E la sô dirigence e à ancje
presentât ideis pal avignî, che o sperin di podê realizâ», al à declarât Eros Cisilino,
president de Agenzie regionâl pe lenghe furlane.*

Cu la instalazion dai gnûfs cartei, la stazion de citât ducâl – adun cun dutis chês altris che
a fasin part de linie – e torne duncje a pandi ad implen la proprie identitât linguistiche e
culturâl. La presince de segnaletiche trilengâl (furlan, talian, sloven) e rapresente di fat no
dome une forme di atenzion bande il patrimoni linguistic locâl, ma ancje un valit imprest di
marketing teritoriâl.

I cartei trilengâi a tornin duncje a jessi part de narazion dal teritori: un element bon di dâ
acet a viazadôrs e visitadôrs e di fevelâur, fin dal prin moment, de culture e de identitât di
chel lûc. A son elements che di une bande a judin a valorizâ ancje il patrimoni linguistic e
di chês altre a promovin la specificitât dal Friûl e de sô storie.

Cun di plui, vê tornât a instalâ i cartei al rinfuarce lis raccomandazions che il Consei di
Europe al indrece aes Regions in materie di tutele e valorizazion des lenghis minoritariis,
in particolâr la Risoluzione 301/2010 che, tal 2016, e veve puartât la Agenzie regionâl pe
lenghe furlane - ARLeF e Ferrovie Udine-Cividale - FUC a firmâ un protocol di intese.

Udin, ai 6 di Març dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<